



**DISKURSU VICE MINISTRO  
KONA BA  
SELEBRASAUN LORON MUNDIAL BA AMBIENTE (05 de Junho de 2016)**

Excêlencias Membros do VI Governo Constitucional da RDTL;  
Organizasoens internasional e nasional;  
Parseiros desenvolvimento;  
Entidades hotu no Povu Timor–Leste tomak;

Uluk Nanain, hato’o agradese ba Aman Maromak, tamba ho Na’i nia grasa no tulun ita hotu bele celebra Loron Mundial ba Ambiente iha tinan ida ne’e.

Selebrasaun eventu mundial ambiente iha mundo kada tinan–tinan, ho objectivu fo hanoin ema hotu “Atu hasa’e konsensia global kona ba kestoens ambiental no atu ajuda hodi inspira ba atensaun iha nivel politikus sira, asoens husi comunidade iha mundo tomak nomos komitmentu ema ida–idak nian ba preservasaun ambiente”.

Tema Internasional ba eventu Loron Munidal Ambiente 2016 “Go Wild for Life”  
no Tema Nasional “Mai Ita Hapara Fa’an no Kasa Balada Fuik”.

Ho tema no logo ba tinan 2016 ne’e, foka kona ba trafiku/komersiu ilegal ba balada fuik iha mundo, ho kestaun refere Programa Nasoens Unidas ba Ambiente/UNEP fo atensaun makas hodi kombate trafiku ka komersiu ilegal ba balada fuik, ho nune’e, foti hanesan kestaun principal ba Loron Mundial Ambiente Tinan 2016.

**Senhores e Senhoras,**

Preokupasaun nebe agora mundo infrenta kona ba vida balada fuik, hatudu katak valor ekonomia husi rekursus ne’e importante tebes, ne’e duni persija proteje no salva husi trafiku/komersiu ilegal nomos husi lakon no estragus tamba impaktus alteraçãu climática.

Basea ba tema nasional 2016, GoTL liu husi ministerios no ajencias competente persija foti asoens hodi hapara actividades nebe fo ameasas ba vida balada fuik.

Populasaun TL hosi tinan ba tinan komesa aumenta, necessidade ba rekursus biodiversidade no rekursus naturais hodi fornese ba vida moris prezisa tebes. Maibe Ita hotu hatene katak, efeitu husi alteraçãu climatica fo ona impaktu ba rekursus biodiversidade no rekursus naturais,

Vida moris comunidade iha area remotas dalaruma obriga sira hodi kasa no fa'an rekursus biodiversidade liu-liu balada fuik nomos spesies endemiku, faktus hirak ne'e fo lisaun ida ba governo central hodi resolve no buka solusaun hodi hadia moris comunidade iha area refere.

Asoens nebe persija atu foti maka hanesan: Hadia vida moris comunidade iha area remotas, persija sensibiliza kona ba valor ekonomiku no valor historiku husi balada fuik no balada endemiko nomos oinsa atu proteje no conserva ba rekursus ne'e.

Persija hametin koperasaun no kordenasaun ho instituto nebe halo peskija no identifika ba numero no spesies geral no spesies endemico ka local ita nia rain.

Persija haforsa regulamento hodi bandu atu la bele fa'an no kasa animal fuik nomos haforsa lei hodi bandu para la bele hatama kilat ba kasa.

Persija iha sensibilizasaun hodi hapara fa'an no kasa balada fuik.

### **Senhores e Senhoras,**

Metas MCIa iha Plano Estratejiku Dezenvolvimentu Nasional 2011–2030 maka "Sai hosi rendimento baziku ba iha rendimento medio-alto," nomos hosi parte ambiente liu-liu ba setor biodiversidade iha Estrategia Nacional no Plano Aksaun ba Biodiversidade 2011–2020 ho Planu Estrategia Dezenvolvimento Nasional 2011–2030 maka "Atu atinje protesau no konservasaun apropriadu ba ambiente ho nia rekursus naturais ho dalan desenvolvimento sustentavel no kresimento ekonomia".

Atu atinje metas hirak ne'e, ita presiza desenvolve rekursus humanu ba nivel hotu-hotu, Hasa'e konhesementu ba nivel tekniku, Fasilita data no informasaun ba rekursus Biodiversidade no naturais, Planu no estrategia nebe adekua, Teknolojia, no atensaun ba koperasaun no assistensia husi comunidade internasional hanesan faktus esensial ida nebe presiza atu atinje hosi GoTL liu hosi ministerios apropriadu.

### **Senhores e senhoras,**

Iha liafuan ikus, hodi ministerio nia naran hau CONGRATULA ba Loron Mundial ba ambiente iha tinan 2016 ne'e, espera katak hanesan Timor oan ita hotu iha dever no responsabilidade moral hodi aseguira ba sustentabilidade vida moris balada fuik iha ita nia rain.

Mak ne'e deit, diskursu nebe hato'o, ba ita hotu nia atensaun no kolaborasaun, hau hato'o obrigado wain.

Dili, 05 de Junho de 2016

FILIPUS NINO PEREIRA  
Vice Ministro e Ministro Interino do MCIa

